



Шочмо эл, порылык да чын верч!

Б У Д Ъ Г О Т О В /

14-ше (3765) №,  
2026 ий 10 апрель,  
кугарня



0+

# ЙМДЕ ЛИЙ

1933 ий 1 февраль годсек лектеш.



«Пеледше тукым» конкурс годым.

## Йоча – илышын пеледышыже

Түням шке моторлыкшо дене куандараш кеч-могай пеледышлан виянгах да пенгыдемаш кўлеш. Йочаланат ты корным эртыман. Усталыкым түрлө конкурсышто тергымаш ончыкылык илышлан кугу шўкалтышым ышта, пеледыш семынак түз-

ланаш полша. Ты шонымашым илышыш шындараш манын, Марий тўвыра рўдер «Пеледше тукым» республикысе йоча усталык конкурсым ий еда эртарам.

3 апрельшыте Курчак театрышке республикын 11 районысо ден округысо, Йошкар-Оласе

йочасадлаш коштшо ўдыр-рвезе-влак погыненыт. Залыште йомак шўлыш озаланен: икшыве-шамычлан весела кумылым Маша ден Маска пөлекленыт.

*Иван РЕЧКИНЫН фотожо-влак.*

*Умбакыже –  
3-шо лаптыкыште.*

ПОДПИСКЕ

16 апрель марте 2026 ийын кокымшо пелийжылан «Ймде лий» йоча газетлан шулдырак ак – 450 тенгеат 12 ыр – дене возалтын шуктыза. Индекс: П4696. Тыгак редакций гоч подпискым ышташ лиш: ак – 200 тенге.

Рекламе.



## Кугешнена!

30 март гыч 2 апрель марте Москошто кадет, юнармеец да сарзе патриот клуб-влакын «Служить России» XXII всероссийский сборышт эртаралтын. Тушко 31 команде ушнен. Марий Элын чапшым Советский район Ургаш лицей-интернатыште 10-шо классыште тунемше-влак (снимкыште) араленыт.

Кадет-шамыч вий-куатыштым да усталыкыштым спорт тагасымаште, строй дене коштымаште да мурым йонгалтарынамаште ончыктеныт. Йошкар площадьыште,

Александровский садыште да моло вере экскурсий дене коштыныт. Сборышто Ургаш лицейыште тунемше-шамыч сай лектышым ончыктеныт. Вич номинацийыште икымше верым сенен налыныт, кум түрлө тагасыште кокымшо лийыныт.

Удыр-рвезе-влакым сенынамаш дене саламлена. Ончыкыжымат тыгаяк чулым, писе да виан лийза!

*Оля МАЙКОВА.*

*Фотом Марий Элысе Образований да науко министерствын «ВКонтакте» воткылысе тужкаж гыч налме.*

## Российысе увер

«Урок цифры»

всероссийский тунемме проектын платформыштыжо черетан урок 26 апрель марте шуйна. Ты гана тудо «Как кодить на квантах» темылан пöлеклалтын. Кумданрак – урокцифры.рф сайтыште.

«Здоровая семья – сильная Россия» всероссийский спорт фестивалыш еш дене ушныза да идалык мучко түрлө заданийым шуктыза. Түрыс уверым многодетные-семьи.рф сайтыште лудса.

Сүретлаш йöратыше 14-18 ияш удыр-рвезе-шамыч мастарлыкыштым «Мир будущего глазами детей» конкурсышто терген кертыт. Тагасымашке 17 май марте ушнаш лиеш. Күлеш уверым far.ru сайтыште рашемдыза.

## Марий Элысе увер

Республикысе школлаште тунемше-влак всероссийский олимпиадылаште сай лектышым ончыктеныт. Экологий дене Дарья Уткина (3-шо номеран Медведево гимназий), немыч йылме дене Мила Бем (Йошкар-Ола, 11-ше номеран лицей), химий дене Руслан Мингазутдинов (28-ше номеран лицей) сеныше радамаш лектыныт.

Тений «Марий кенжеж» уреммысе фестиваль визымше гана эртаралтеш. Оласе уремлаште, парклаште да вес кумдыклаште мероприятий-влак лийыт. Рүдолаш каналташ але экскурсий дене толмыда годым программмы шотыш налза.

С.Г.Чавайн лүмеш Калыкле книгагудышто Ю.А.Гагаринын түрлө элышке миен коштымжлан пöлеклалтыше «Гагаринские орбиты» ончер почылтын. Тушто шуэн вашлиялтше фото, документ-влакым ужаш лиеш.

## «Кубик Метри»



«Пушкин карте» нерген кызыт чыланат палат, понем. Тудо шуко вере яра миен кошташ йöным ышта. Мыят кучылтам. Марий спектакльым ончаш моткоч йöратем. Билет шулдо огыл, а ты карте дене налын, ача-аван оксаштым аныклаш лиеш.

Шукерте огыл, «Пушкин карте» дене тўлен, М.Шкетан лүмеш

театрыш Зинаида Долгован пьесыж почеш шындыме «Кубик Метри» спектакльым ончаш миенам (снимкыште).

Драме кызытсе илышлан келшен толеш. Кубик Метрин йоча пагытшым тенийысе икшывын илышыж дене от тагастаре. Чылажат вес семын лийын. Аваже изи эргыжым моткоч йöратен. А кугу лиймекше, Метри лишыл енге дек толынат каен огыл. Шонгеммеке, чонжо шочмо верыш шупшын.

Спектаклысе түрлө тат воштылашат таратен, шинчавүдымат луктын. Авторлан, режиссёрлан, артист-шамычлан кугу таум ойлем.

Йоча-влак, «Пушкин карте» дене моштен пайдаланыза.

*Юлия ЯГОДАРОВА.*

*Советский, Кельмаксола. Фотом еш архив гыч налме.*

# Йоча – илышын пеледышыже



Тўналтышыже –  
1-ше лаштыкыште.

Йожо икшыве тўрлў номинаци-йыште таґасен. Теве Оршанке район Кугунур йочасадыш коштшо Арина Прозорова ден Вера Козлова (**снимкыште**) «Изи мўкш» ансамбль дене пырля куштеныт. Вара ўдыр-влак «Йолташем ден коктын» мурым йонгалтареныт. «Ме мураш моткоч йўратена. Репетицийыш эре пырля коштына. Кугече пайремлан «Пасха

красная» мурым ямдылена», – ойлат Арина ден Вера.

– Икшыве-влакым ме узинек мураш-кушташ тунык-тена, тўрлў конкурсышто вийнам тергена. «Пеледыше тукумлан» ямдылалташ шукын полишеныт: Елена Сергеевна Рыбакова мурым кельштарен, селасе тўвыра пўрт паша-ен-шамыч куштымашым тўрленят. Чаманен каласыман, йоча-влак марла начарынрак мутланат, коклан веле марий шомакым колаш логалеш. Туге гынат шочмо марий йылмым эре ушештарена, – палдара Кугунур йочасадын воспитательже Светлана Борисовна Мочалова.

Каже коллектив, каже икшыве шке семынже уста да ойыртемалтше койышан лийын. Но конкурсышто эн виянже сенгышыш лектеш. Журин иктешлымыж почеш, куштымаш номинаци-йыште икымше верым Советский посёлкысо 3-шо номеран йочаса-



дысе «Изи шўдыр» ансамбль налын. Эн виян мурызылан Шернур посёлкысо «Сказка» йочасадыш коштшо Анастасия Волкова шотлалтын. Эн тале дуэт семын Вера Козлова ден Арина Прозорова ойыртемалтыныт. Эн тале мурышо ансамбль семын Йошкар-Оласе 67-ше номеран йочасадысе «Колокольчик» ансамбль (**снимкыште**) палемдалтын.

Катя СЕРГЕЕВА.  
Авторын фотожо-влак.

## Корно – «Артекыш»

Йошкар-Оласе Йожа да самырык-влак усталык полатыште «Илыше классике» тўнямбал конкурсын республикысе йыжынже эртаралтын. Таґасымашке 45 ўдыр-рвезе ушнен. Нуно руш автор-влакын да марий литературын классикше-шамычын произведенийышт гыч ужашым лудыныт. Тений «Научный фантастике жанран сылнымут гыч ужашым лудмаш» посна номинаций лийын.

Журин ойжо почеш, икшыве-влак мастарлыкышт дене ойыртемалтыныт, сылнымутым чын умылымышт шижалтын, тудым колыштшо еґ деке раш намиен шуктеныт. Рушла лудшо-шамыч коклаште Анна Коновалова (Волжск ола, 10-шо номеран школ), Елизавета Старикова (Т.В.Иштрикова лўмеш «Синяя птица» гимназий) сенгышыш лектыныт. Научный фантастикым лудмыж дене Анастасия Петухова (Курыкмари, Виловат) ойыртемалтын. Сенгыше-шамыч Марий Элын чапшым конкурсын всерос-



сийский йыжынгыштыже аралаш тўналыт. Тудо «Артек» тўнямбал йоча рўдерыште эртаралтеш.

Шернур округ Кукнур школышто тунемше Арина Актуганова, Курыкмари район Пўзыкнур школ гыч Арина Английская, Марий Турек школышто тунемше Доминика Матвеева (**снимкыште**) марла лудшо-влак коклаште сенгышыш лектыныт.

Людмила ГРИГОРЬЕВА ямдылен.  
Фотом «ВКонтакте»  
воткылысе «Волгечен» рўдер»  
тўшка гыч налле.

## Шинчымашнам келгемденна

Шукерте огыл Марий кугыжаныш университетын Аграрно-технологический институтыштыжо «Агроноваторы» республикысе фестиваль эртаралтын. Тушко районласе да оласе школла гыч 5-11-ше класслаште тунемше шымле наре ўдыр-рвезе погынен. Нуно я агрокласыште тунемыт, я юннат клубыш коштыт. Мемнан школ гыч кумытын миенна: Ксения Озеркина, Фёдор Ямбашев да мый. Мыланна кум тўрлў онгай мастер-класс эртаралтын. Мый «Агротехнологийыш» миенан, Ксения – «Агрономийыш», Фёдор – «Агроинженерийыш». Шуко онгайым пален налынна, шинчымашнам келгемденна. Ялзанлык паша деке эше лишкырак лийынна. Ала ончыкылык илышнама т ты алан дене кылдена?

Яна ТИМОФЕЕВА.  
Волжский, Пўтвьял.

## Чавайн



тукым улына

## Сылнымут ваш ыштен

Ончыч түрлө конкурсышто ч ү ч к ы д ы н вашлиялтынна. Угарман кундем Дивеево селаште лиймына годым лишкырак палыме лийына. Тушко икымше мари́й сотемдарче, священник Гавриил Яковлевич Яковлев лүмеш премийым налмыланна көра логалынна. Чавайн лудмаште кылна эшеат пенгыдемын. Тыге лишыл йолташыш савырненна (снимкыште). Койыш-шоктышна да тўняумылымашна дене икгай улына, сылнымутым йоратена. Кызыт я Моркыш, я Изи Кушнаш уналыкеш коштына.

Регина ГРИГОРЬЕВА,  
Марина БИРЮКОВА.

Морко район.  
Оля МАЙКОВАН фотожо.

• Могай ойлымаш почеш сўретым келыштарыме? •



Камилла СТЕПАНОВАН сўретше.  
Морко, Коркатово.

## «Йоратыза шочмо йылмым, тудым өрканыде тунемза»

Тыге ойлен шке жапыштыже чапланыше мари́й поэт Шабдар Осып. Шернур округ Марисола школышто 11-ше классыште тунемше Екатерина Петухова (снимкыште) ты кангашым шукташак тырша. Тудо мари́й улмыж дене моткоч кугешна.

– Ешыште, школышто, йолташ-влак коклаште шочмо йылме дене кутырена. Вес семын лийынжат ок керт, – ойла ўдыр.

Катя 1-ше гыч 9-ше класс марте Шўдымари́й тўн школышто тунемын. Йылмым келгын шымлаш, сылнымутым йораташ шўмандыше икымше туныктышыжо С.Ф.Рыбаковалан да мари́й йылме ден литературым вўдышө И.Е.Ефимовалан таушта. Нуно нөргө ушыш шинчымаш нөшмым ўденит. Кызыт саскаже лектышан. Самырык ўдыр сылнымут конкурслаште шкенжым чолган ончыкта, олимпиадылашке ушна. Сенымашыже ятыр. Пўсө уш-акылжым «Мунло» модмаштат икмыняр гана терген.

– Мари́й литератур урок поснак келша. Марисолаште тудым Светлана Мартынов-



на Максимова туныкта. Произведенийласе лирический герой-влакын койыш-шоктышыштым лончылен, ылышысе түрлө йонгылыш деч коранаш лиеш. Мутлан, «Орина кова» повесть гоч автор, Мари́й Элын калык серызыже Мария Илибаева, кугуракым пагалаш кўлмө нерген каласкала. Ты книга чоныш логалше, – палдара Катя Петухова.

Оля МАЙКОВА.  
Фотом еш архив гыч налме.

## Пиалым конда

Шошо толын – шыргыжеш,  
Кече лумым шулыкта.  
Вўд памашла йогалеш,  
Кайык сылнын муралта.

Ах, моткоч куаненам:  
Мланде угыч ужарга.  
Ош висвисше, пеледалт,  
У пиалымак конда.

Павел ВАСИЛЬЕВ.  
Волжский, Сотнур.

### • Синквейн •

Мари́й Эл  
Шерге, лишыл.  
Сылнештеш, пеледеш, тўзлана.  
Мемнан шочмо мландына.  
Ава.

Владимир АЛЕКСАНДРОВ.  
Морко, Шўргыял.

## Шошо – куан

Шошо – йоратыме пагытем. Кужу да йўштө теле деч вара йомакысе гай шошо толын. Тамле омо деч вара пўртүс помыжалтеш. Кече утларак шокшын да веселан ырыкта. Коремлаште вўд шыргыкта. Юж тамле да яндар лийын. Лай мардеж «Тыят помыжалт!» манын, мемнан капнам ниялта. Чодыраште лумпеледыш шошо толмым эн ончыч шижтара. Вара корем серлаште апашудо, полдышла койын, торашке волгалтеш. Мландым ужар порсын эркин леведеш. Шокшо элла гыч шулдыран йолташна-влак пёртылыт. Нунын сылне мурышт эшеат кумылым нөлта. Шошо у шонымашым ылыжта, ылышлан куанаш тарата.

Полина ОСИПОВА.  
Волжский, Пётъял школ пеленысе  
Йоча ұсталык пёрт.



## Кумшо вер

27-28 мартыште Йошкар-Олаште «Первые роли» школ театр-влакын республикысе фестиваль-конкурсышт эртаралтын. Тушко республикысе тўрлő школ гыч 1-11-ше класслаште тунемше артист койышан ўдыр-рвезе-влак погыненыт. Кок кече жапыште 33 ойыртемалтше спектакльым ончыктеныт. Шернур округын чапшым мемнан школын «Театральные звёздочки» (вуйлаты-

ше – Э.В.Чемекова) театр ушемже арален. Тушко 1-ше классыште тунемше-влак (снимкыште) коштыт. Нуно Светлана Григорьеван «Аван мутшо шергакан» произведенийже почеш постановкым ончыктеныт. Иктешлымеке, кумшо верым сенен налыныт. Шокшын саламлена!

*Н.Г.ВОЛКОВА.  
Шернур, Лажъял.*

*Фотом школ архив гыч налме.*

## Тагасымашке ушненна

«Российская школьная весна» проект-фестивальын республикысе йыжынгыштыже тўрлő номинаций дене 54 коллектив да шкет участник-шамыч тагасеныт. Меат, Унчо школышто тунемше-влак, мастарлыкнам ончыктенна. 8-9-ше классла гыч ўдыр-влак,

тыгак Шлань клуб пеленысе «Кечыйол» куштышо группын участникше-шамыч «Дети войны» куштымашым аклымашке луктынна. Мый «Фотопроект» тагасыште II степенян лауреат лийынам.

*Эмилия ИЛЬИНА.  
Морко район.*

## Тўвыра поянлык



«Культура для школьников» проект радамаште «Марий калыкын тўвыра поянлыкше» мероприятием эртаренна. Тункытышо Елена Валериановна марий семўзгар-влак дене пал-

дарен. Шиялтыш дене шоктен ончыктен. Мыят ты семўзгар дене «Морко пазарыш» мурын семжым пырля тунемме йолташем-влак ончылно йонгалтаренам (снимкыште). Кок ий ончыч «Изи памаш» район фестивальыште шиялтышым шиялтыме дене кумшо верым сенен налынам. Ме кугезе коча-кована-влакын йўлаштым, тўвыраштым, семўзгарыштым палышаш улына. Нунын поянлыкыштым ончыкыжым мыланна аралыман.

*Надежда СЕРГЕЕВА.  
Морко, Шўргыял.  
Фотом школ архив гыч налме.*



## «Чолга шўдыр»

Март мучаште Шернур посёлкышто сылне марий муро йонген. Шым ияш деч кугурак ўдыр-рвезе да кугыен-шамыч «Чолга шўдыр» районысо конкурсышто мастарлыкыштым тергеныт. Икте калык мурым йонгалтарен, весе – эстрадысым. Фонограммат, семўзгарат марий мурым моткоч сōрастареныт. Ты конкурсыш мыят икымше гана ушненам. Шке возымо «Пўнчерем» мурем дене 15-18 ияш солист-шамыч коклаште икымше верым сенен налынам (снимкыште).

Кажне участник мастар лийын. Изижат-кугужат шўшпык йўкышт дене жюри ен-влак ден калыкым куандареныт. Кажныжым колыштын, шукылан тунемынам. Тек ты конкурсын ўмыржō кужу лиеш.

*Кирилл НОВОСЁЛОВ.  
Шернур, Кукнур.  
Фотом еш архив гыч налме.*



### Ушан ой

Эсен лийже куштылгын койшо усталык!

Эсен лийже шўм гыч пунчалме пўжвўд!

*Семён НИКОЛАЕВ.*



Вүдвискалыше-влак коклаште вүдын секретшым палыше мунло коча лийын. Тудлан изи Вүдвискалыше – Мардеж – польш-кален. Тудо у изи ер-влакым шымлаш эн ончыч куржын да тужем йодышым пуэден.

Ик эрдене, кече помыжалт-меке, Вүдшынга-влак умылаш лийдымым ужыч: ерыште вүд шагалемын, а энерыште мөнгешла – шукемын.

– Ой-ой! Мо лийын? Куш йомын вүдна? – Вүдвискалыше-влак тургыжланаш тўналгыч. Коча сангажым куптыртыш, нуным иквереш погыш да Келге ерын

тайныжым пален налаш шўдыш. Эн ончыч Мардеж тарваныш.

– Мый каем, чыла шымлен налам! – тудо чулымын каласыш. Вүдвискалыше коча шыргыжале да мане:

– Йўра, но шеклане! Пеленет ийын коштшо копшангым нал, кўлеш гын, тудо вүд йымалне пеш писын ийын мошта.



Теве изи Мардеж ден копшанге вүд ўмбачын вүдча да омыж воктеч каяш тарванышт. Кенета Мардеж серыште ала-мом йылгыжшым ужо. Тиде кугу кў – Онар. Кў кокла гыч вүд вичкыж йогын дене йоген лектеш. Ийын коштшо копшанге вүд йомак пурен кайышат, ужо: ер гыч вүд изи энерыш йоген лектеш. Онар кў ўмбалне Шўгў копшанге ойгырен шинча.

– Салам, Шўгў, – манеш изи Мардеж. – Мо лийын? Молан

тынар шўлык-кан улат?

– Ой, азап. У пўртым чоҥышем-ла, Онар кўм тунар

пурын пытаренам – тушто рожым ыштенам. А тиде патыр кў плотина гай лийын. Келге ерысе вүдым авырен, – шортын колта Шўгў.

– Ит тургыжлане, ме тыланет полшена, – манеш Мардеж.

Изи Мардеж ден ийын коштшо копшанге мөнгышкышт пўртылыт да кочаштлан чыла каласкалат. Коча Вүдвискалыше-влакым пырля пога да ойго нерген умылтара. Чылан погынен, рожым тыгыде кў, лышташла да укшла дене писын тумыштат. Ерысе вүд шке келгытшым пўртылта.

Полина АЛЕКСЕЕВА.  
Морко, Коркато.во.

## Могай йомак?

Йоча-влак, йодыш-шамычлан вашмутым пуэн, могай йомак нерген ойлалтмым пален налза.

- Изи ўдыр кушко каен?
- Туддене чодыраште мо лийын?
- Могай пўртыш миен лектын?
- Михайло Иванович – тиде ...
- Настасья Петровна – тиде ...
- Мишутка – тиде ...
- Пўрт мыняр пўлеман?
- Изи чайгорка могай тўсан лийын?
- Изи ўдырым маска-влак поктен шуыныт мо?

Вячеслав СМЕРНОВ ямдылен.

• Йошкар Упшлан коважын суртшо деке миен шўаш полшыза.



## Арбуз

Ик мотор кечын Арбуз, иктаж-кўм ондалаш шонен, корно дене пўрдын кая. Ваштарешыже Вўдава толеш.

– Кушко тыгерак пўрдат, Арбуз йолташ? – палынеже тудо. – Мый тый декет вўдетым кошташ каем. Теве ончо, могай кушко улам. Тыйын вўдетым йўам да чонем ылыжеш, а тый кошкет! – пелешта Арбуз.

Вўдава шыдешка, Арбузыш чот гына вўдым шава да «Тетла мыйым ит ондале» манын умбакыже кая.

Арбуз чылт нўрен пытен, корно дене топыртата. Ончылно Сакрыушмен ешыж дене модеш. Нуно воштылыт, юарлат. Арбузым шекланат да кушко кайымыже нерген йодыт. Арбуз адакат шойышташ шонен пышта.

– Мый тендан деке сакрыдам кочкаш, шерыдам поген налаш толынам. Мый тендам кочкам – те кошкеда, Кочушменыш савырнеда, – манеш Арбуз.

Сакрыушмен Арбузлан сыра да тудым тышке-тушко пўрдык-

тылаш тўгалеш.

Туге гынат пеленже сакрыло-жашым пуэн колта.

Шере, вўдан Арбуз умбакыже пўрдеш. Кеч-авам вашлиеш. Тудат Арбузын кушко кайымыжым палынеже. Арбуз моткоч шыдешкен пелешта:

– Тыйым кычал каем ыле! Могырем пеш вўдан, шере, мыйым кошто!

Кечава Арбузлан чыла шокшыжым пуа.

– Теве тыланет шокошо, кошко, – малдалеш.

Арбуз ошемын, ужарген, йошкарген, шемемын кая. Вожылмыж дене тўс палым кода. Таче кечынат Арбузын туп-вачыже ошалге-ужарге да шемалге-ужарге корнан, а кўргыжў йошкарге да шем томан.

Марк ГОРШКОВ.  
Волжский, Пётъял.





## Цирк келшен

Озан олаш экскурсий дене ми-  
снна (снимкыште). Татарстан Рес-  
публикын рүдолаже мотор. Орал-  
те-влакын тужвал сынышт сылне.  
Олам ончен коштмеке, циркыш  
пуренна. «Маршрут построен»  
шоу кажныланна келшен. Түрлө  
спецэффект ик татлан юзо тўняш  
нангасн. Южышто акробат-влак

түрлө семын пörдыныт, ушан  
янлык-шамыч озаштын күшты-  
мыштым тыманмеш шуктеныт.  
Чылажат öрыктарен. Тыгай куан-  
ле экскурсийым эртарымыштлан  
туныктышо-влаклан тауштем.

**Марина ГРИГОРЬЕВА.**  
Морко, Нуж-Ключ.  
Фотом школ архив гыч налме.

12 апрель – Авиаций да космонавтикке кече.

## Икымше космонавт лүмеш



«1961 ий 12 апрельште мем-  
нан элыште куан увер шарлен:  
айдеме икымше гана сандалы-  
кыш чоҗештен. Юрий Гагарин

«Восток-1» корабль дене 108 ми-  
нутышто Мланде йыр савыр-  
нен. Тиде элнан историйышты-  
же кугу пайрем лийын. Ты  
кече лүмеш авам дене коктын  
сүретым сүретленна», – кала-  
сыш Полина Гритчина (сним-  
кыште) да кок пашажым мы-  
ланем кучыктыш. Изи ўдырын  
сүретше-влак дене пайдаланен,  
Йошкар-Оласе 80-ше номеран  
йочасадыш коштшо икшыве-  
шамыч дене мутланымашым эр-  
тарышна. Нунылан шўдыр, пла-  
нет, сандалык да моло нерген  
пален налаш онгай ыле. Поли-  
нан пашаже йочасадыште Ави-  
аций да космонавтикке кечылан  
пöлеклалтше лукым келышта-  
раш амалым ыштыш.

**Надежда ГОДУНОВА.**  
Авторын фотожо.

12 апрель – Кугече.



**Милана ГРИГОРЬЕВАН** сүретше.  
Волжский, Пöтъял.

### • Метаграмме •

Тудо кече йыр пörдеш,  
М буква гыч тўналеш.  
Ик букважым вашталтет –  
Тылзе лүмым тый палет.

(;udw – эрр: :иштм) (Вашмут: мар)



Газетым Кыл, информационный  
технологий да массовый  
коммуникаций сферым  
эскериме шотышто  
федеральный службын Юл кун-  
дем федеральный округысо  
управленийыштыже  
регистравалтыме.  
Номер – ПИ № ТУ52-01404,  
2023 ий 22 сентябрьште пумыо.

Марий Эл  
Республикысе  
«Марий Эл»  
увер агентстве» КАУ.  
Директор –  
Е.И.КУЗНЕЦОВ.  
Тўн редактор –  
А.Н.ГРИГОРЬЕВА.

Индекс П4696.  
Тираж 1500 экз.  
Заказ  
Формат – А-4-8.

Учредитель-влак:  
Марий Эл Республикысе Тўвыра,  
печать да калык-влакын пашашт  
шотышто министерстве,  
Марий Эл Республикысе  
«Марий Эл» увер агентстве» КАУ.

Редакций да издатель: Марий Эл  
Республикысе «Марий Эл»  
увер агентстве» КАУ,  
424006, Йошкар-Ола,  
СССР Вооружённый Вийын 70-ше  
идалькыше урем, 20-шо пöрт.  
Тел. 8(8362) 45-22-82.

Газетым редакцийыште  
погымо да версталтыме,  
«Марий Эл Республикысе  
Правительствын  
типографийже» ООО-што  
ямде оригинал-макет гыч  
савыктыме.  
Типографийын адресше:  
424000, Йошкар-Ола,  
Комсомольский урем, 112.

Печатьыш пумы жап –  
14-00, фактически – 13-00.

Авторын да редакцийын  
шонымашышт түрлө лийын кертят.  
Серыш-влак мөнгеш огыт колталт.  
Ак – кутырен келшыме почеш.

[https://vk.com/yamde\\_lii](https://vk.com/yamde_lii)

<https://t.me/yamdelii>

[yamde\\_lii@mail.ru](mailto:yamde_lii@mail.ru)

[yamdelii@mediamari.ru](mailto:yamdelii@mediamari.ru)

(автор-влаклан)

Сайтын адресше: ямделий.рф

У конкурс




Гордей ПАНЬКОВ  
йолташыже-влак дене пырля.  
Перьмь ола.




Алексей ГРИГОРЬЕВ ден  
Алексей СОРОКИН.  
Марий Турек, Сардаял.

Икгай муным кычалза.




Келшыше  
ўмылым муза.



Алексей ТИМОФЕЕВЫН сўретше.  
Волжский, Сотнур.

Маскалан Мланде марте миен шуаш полшыза.



Шотлыза.



Сўретым ончен,  
цифр-влакым  
ушыза да чиялтыза.

